



## «ԳՈՐԾԱՐԱՐ ՇԱԽԵՐԻ ՊԱՀՏՊԱՆՈՒԹՅԱՆ ՑԱՆՑ»

### Կ Ա Ն Ո Ն Ա Կ Ա Ր Գ

#### *Նպատակը և առաքելությունը*

«Գործարար Շախերի Պաշտպանության Ցանցը» (այսուհետ՝ Ցանց) կազմակերպությունների ոչ պաշտոնական միավորում է, որի նպատակն է միացյալ ուժերով նպաստել Հայաստանում սոցիալ-տնտեսական բարեփոխումների իրականացմանը և մասնավոր ձեռնարկատիրության զարգացմանը, ապահովելով գործարար հանրության և քաղաքացիական հասարակության ներգրավվածությունն ու մասնակցությունը հանրային քաղաքականության մշակման, իրականացման, վերահսկման և գնահատման գործընթացներում պետական-մասնավոր երկխոսության մշակույթի զարգացման և հզորացման միջոցով:

#### *Խնդիրները*

- Համակարգել Ցանցի անդամների գործունեությունը ի նպաստ երկրում սոցիալ-տնտեսական բարեփոխումների իրականացման, ՓՄՁ ոլորտի զարգացման և գործարար միջավայրի բարելավման:
- Ապահովել փոխադարձ կապ Ցանցի անդամների և շահագրգիռ այլ հասարակական կառույցների, պետական և մասնավոր ոլորտի ներկայացուցիչների, ինչպես նաև միջազգային կազմակերպությունների միջև:
- Մասնակցել մասնավոր ձեռնարկատիրության և մասնավորապես ՓՄՁ ոլորտի զարգացմանն ուղղված հանրային ծրագրերի մշակման և իրականացման գործընթացին՝ ներկայացնելով Ցանցի անդամների միասնական տեսակետը և դիրքորոշումը:
- Ձեռնամուխ լինել Ցանցի անդամների կողմից առաջ քաշված կարևոր հիմնախնդիրների ներկայացմանը և քննարկմանը զանազան ատյաններում և համապատասխան լուծումների հետապնդմանը:
- Նպաստել ՓՄՁ շախերի պաշտպանությանը, ՓՄՁ սուբյեկտների զարգացման կարողությունների և ունակությունների բացահայտմանն ու իրացմանը, ինչպես նաև տնտեսական մրցակցության հավասար հնարավորությունների և պայմանների ձևավորմանն ու զարգացմանը:
- Նպաստել գործարար հանրության և քաղաքացիական հասարակության իրազեկության բարձրացմանը հանրային քաղաքականությունների մշակման և օրենսդրական բարեփոխումների իրականացման վերաբերյալ:

- Նպաստել Ցանցի անդամների մասնակցությանը տարբեր տեսակի տեղական, տարածաշրջանային և միջազգային միջոցառումներին:

### ***Գործունեության ուղղությունները***

Ցանցի գործունեության հիմնական ուղղություններն են սոցիալ-տնտեսական և մասնավոր ձեռնարկատիրության, հատկապես ՓՄՁ ոլորտներին առնչվող.

- օրենսդրական նախաձեռնությունների, պետական քաղաքականության և ծրագրերի վերաբերյալ փորձագիտական վերլուծությունների, ուսումնասիրությունների իրականացում,
- պետական և հանրային քաղաքականության և ծրագրերի իրականացման վերահսկում և գնահատում,
- բարեփոխումների և զարգացման ծրագրերին աջակցություն,
- առկա հիմնախնդիրների և հրատապ հարցերի վերաբերյալ քննարկումների, սեմինարների և այլ միջոցառումների կազմակերպում և իրականացում,
- շահերի պաշտպանությանն ուղղված քարոզարշավների և այլ միջոցառումների կազմակերպում և իրականացում,
- կառավարական, տեղական ինքնակառավարման մարմինների, ինչպես նաև ոչ կառավարական և միջազգային կազմակերպությունների և զանգվածային լրատվամիջոցների հետ համագործակցության նախաձեռնում և իրականացում,
- Ցանցի նպատակների և խնդիրների իրականացմանն ուղղված ցանկացած այլ գործունեություն, որը չի հակասում ՀՀ օրենսդրությանը:

### ***Գործունեության սկզբունքները***

Ցանցի գործունեության հիմնական սկզբունքներն են.

- անդամների հավասարությունը,
- համերաշխությունը,
- թափանցիկությունը,
- փոխհամաձայնությունը,
- քաղաքական չեզոքությունը
- արդյունավետությունը:

## ***հրավական կարգավիճակը***

Ցանցը իր գործունեությունն իրականացնում է առանց պաշտոնական գրանցման ինչպես Հայաստանի Հանրապետության ողջ տարածքում, այնպես էլ նրա սահմաններից դուրս:

## ***Ցանցի կառուցվածքը և կառավարումը***

Ցանցի գործունեության կառավարման գերագույն մարմինն է Ցանցի անդամների ընդհանուր ժողովը /այսուհետև՝ ժողով/:

Ժողովի քվորումը ապահովվում է անդամների պարզ մեծամասնության մասնակցության դեպքում:

Ժողովի որոշումները ընդունվում են փոխհամաձայնության (կոնսենսուսի) սկզբունքի հիման վրա, իսկ դրա անհնարինության դեպքում ներկաների ձայների պարզ մեծամասնությամբ:

Ժողովը՝

- հաստատում է Ցանցի Կանոնակարգը և փոփոխությունները
- հաստատում է Ցանցի Ռազմավարությունը,
- հաստատում է Քարտուղարության որոշումը անդամի անդամակցության դադարեցման վերաբերյալ,
- ընտրում է Ցանցի Քարտուղարություն /այսուհետև՝ Քարտուղարություն/, որը հանդիսանում է Ցանցի գործունեությունը համակարգող գործադիր մարմինը:

Արտահերթ ժողովներ կարող են հրավիրվել ըստ անհրաժեշտության՝ Քարտուղարության կամ Ցանցի անդամների 2/3–ի նախաձեռնությամբ:

## ***Քարտուղարությունը***

Քարտուղարությունը հանդիսանում է Ցանցի գործունեությունը համակարգող կառավարման կոլեգիալ գործադիր մարմինը:

Քարտուղարությունը բաղկացած է մինչև 7 անդամից և ընտրվում է ժողովի կողմից 3 տարի ժամկետով:

Քարտուղարության որոշումները կայացվում են նիստերի ժամանակ կամ հեռակա կարգով կոնսենսուսի կամ քվեարկության միջոցով՝ քվեարկությանը մասնակից անդամների ձայների պարզ մեծամասնությամբ: Որոշումը համարվում է օրինական, եթե քվեարկությանը մասնակցել են Քարտուղարության անդամների կեսից ավելին:

Քարտուղարությունը՝

- համակարգում և կառավարում է Ցանցի աշխատանքները և ընթացիկ գործունեությունը,

- իրականացնում է ժողովի կողմից ընդունված որոշումները,
- կազմակերպում է Ցանցի հերթական և արտահերթ ժողովները,
- հաշվետվություններ է ներկայացնում ժողովին Ցանցի գործունեության վերաբերյալ,
- ընդունում է նոր անդամների անդամագրման վերաբերյալ դիմումները և հաստատում է նրանց անդամակցությունը տեղեկացնելով այդ մասին ժողովին,
- կազմակերպում և ապահովում է ընթացիկ իրազեկման, տեղեկատվության և անհրաժեշտ հաղորդակցության ապահովումը Ցանցի անդամներին,
- Ցանցի գործունեության շրջանակներում կազմակերպում է աշխատանքային հանդիպումներ և քննարկումներ, սեմինարներ, կոնֆերանսներ և այլ միոցառումներ
- իրավասու է տնօրինել և որոշում կայացնել Ցանցի գործունեությունը վերավերվող բոլոր հարցերի վերաբերյալ, բացառությամբ ժողովի իրավասությանը վերապահված հարցերից:

### ***Անդամակցությունը և անդամակցության դադարեցումը***

Ցանցին կարող է անդամակցել ցանկացած իրավաբանական կամ ֆիզիկական անձ, որն ընդունում է Ցանցի գործունեության սույն Կանոնակարգում արտահայտված նպատակները, խնդիրներն ու գործունեության սկզբունքները և դա հաստատում է Ցանցի Հուշագրում իր ստորագրությամբ:

Ցանցի ցանկացած անդամ կարող է դուրս գալ Ցանցից իր նախաձեռնությամբ առանց որևէ խոչնդոտի, նախապես գրավոր տեղեկացնելով Ցանցի Քարտուղարությանը այդ մասին:

Ցանցին անդամակցությունը կարող է դադարեցվել Քարտուղարության առաջարկով և ժողովի հաստատմամբ հետևյալ դեպքերում.

- անդամի կողմից Ցանցի սույն Կանոնակարգով և Հուշագրով սահմանված նպատակներից և սկզբունքներից շեղվելու դեպքում,
- առանց ժողովի կամ Քարտուղարության հետ համաձայնեցնելու՝ Ցանցի անունից իրականացվող ինքնագործունեության դեպքում, որը կարող է կամ հանգեցրել է Ցանցի և նրա անդամների հեղինակագրկմանը և վարկաբեկմանը,
- Ցանցի ժողովներին և Ցանցի կողմից կազմակերպված միջոցառումներին առանց հիմնավոր պատճառի պարբերաբար չմասնակցելու դեպքում:

## *Անդամների իրավունքներն ու պատասխանատվությունը*

Ցանցի անդամները իրավունք ունեն.

- մասնակցել Ցանցի ժողովին և դրա իրավասությանը վերապահված որոշումների կայացմանը,
- մասնակցել Ցանցի կողմից նախաձեռնվող կամ իրականացվող միջոցառումներին,
- հանդես գալ նախաձեռնությամբ կամ առաջարկով, ներկայացնելով այն Քարտուղարությանը
- կարծիք կամ դիրքորոշում արտահայտել քննարկվող հարցերի վերաբերյալ,
- ստանալ անհրաժեշտ տեղեկատվություն Ցանցի գործունեության վերաբերյալ,
- դուրս գալ Ցանցից այդ մասին գրավոր նախապես տեղեկացնելով Քարտուղարությանը,
- օգտվել ժողովի որոշմամբ ընձեռնված այլ իրավունքներից:

Ցանցի անդամները պարտավորվում են.

- կանոնավոր կերպով մասնակցել Ցանցի գործունեությանը, ժողովներին և Ցանցի կողմից կազմակերպվող այլ միջոցառումներին (քննարկումներ, սեմինարներ, քարոզարշավներ, կոնֆերանսներ և այլն),
- աջակցել Ցանցի գործունեությանը,
- հաշվետու և թափանցիկ լինել իրենց անդամների, գործընկերների և շահառուների առջև՝ Ցանցի կողմից իրականացվող գործունեության վերաբերյալ: